

## Ont raišuos komelės

Švėnta Juona nakti sopīkau ont savės:  
Dielkuo golio luovuo kāp i kakta gavės?  
Tīla – ausīs spėng. Tik kertie krebždėn žiorkė,  
Vo pri šuona pot i ousta sorkė...

Puodėška pastūmės, patalus nusvėidės,  
Nutariau, kad eisio i papartė žėidus!  
Apkīriejė trauktė bimbala gėismelė  
Ēr rėsnuotė ont raišuos komelės.

Tīle, dailė atidarės longa –  
Mona sorkė baisė bėjė cionga, –  
Traukiau i savi bėrželė aruomata.  
Kuoks naktėis gražoms, kėbienamati!

Ronkas ištėisiau ėr, nusėbraižės bomba,  
Šlumšteliejau tėisė i balondu klomba.  
Puondėivali! Trakšteliejė kuojė...  
Dielkuo monės to nekeravuoji!?

Tupiniejo daba kriavs ėr susėsokės.  
Lig Kaliedu mona bruolis – kriokis.  
Dėinuom zīz ėr ved iš pruota sorkė,  
Naktimis neleid užmėgtė žiorkė...

Baigies pasakas mon so papartė žėido:  
Kuokė lėip gėiduot gėismelė, tuokė gėido.  
Par gīvenėma – pašiorpės ėr atšalės –  
Juojuo tuoliau ont raišuos komelės.